

ՆԵՐՔԻՆ ՏԵՍՈՒԹԻՒՆ

ՀԱՄԱԶԳԱՅԻՆ ՅՕՐԵԼԵԱՆ
(նուէր բոլոր հայերին)

Հայ տառերի գիւտի և տպագրութեան կուլտուրական ազգային յօրելեան... փառահեղ տօնակատարութիւն... 250 ներկացուցիչներ զանազան վայրերից եկած... 400 հեռագիրներ... շնորհաւորութիւններ ոռւններից, վրացիներից, յոյներից, թուրքերից, կաթօլիկ և բողոքական հիմնարկութիւններից...

Փառաւոր հոգեհանգիստ...

Փառաւոր քարոզներ, ճառեր, դասախօսութիւններ...

Փառաւոր ճաշկերոյթ...

Յեռոյ...

Յեռոյ «պատգամաւորները մեկնեցին էջմիածնից»:

«Յօդուտ դպրոցական ֆօնդի» ի յաւերժացումն համազգային յօրելեանի, ստացված տեղեկութիւնների համաձայն, կը հանգանակվի մօտ կէս միլիօն ըուբլի» *):

— Մօտ կէս միլիօն ըուբլի... ի յաւերժացումն համազգային յօրելեանի...

Ես սխալ չը կարդացի: Այդպէս էր գըրված՝ մօտ... կէս միլիօն ըուբլի... ի յաւերժացումն համազգային յօրելեանի...

Երա՞զ է դա, մի ցնորք թէ՞ մեր իրականութիւնը:

Եւ... պատգամաւորները մեկնեցին էջմիածնից:

Արդեօք իրանց պարտքը կատարած համարելով...

Եկան հեռաւոր տեղերից, տեսան իրար, խօսեցին, կարդացին, կերան, ստացան վեհի օրհնութիւնը և... մեկնեցին, հանգստաց-

*) Տես «Մշակ» № 228.